

MUHAMMED A.S. NIJE BIO PROROK!

*Zato opominji - pa nisi ti milošću Gospodara tvog prorok, niti lud. (Kur'an, 52:29)
(Kur'an) nije govor proroka. Malo čega se sjećate! (Kur'an, 69:42)*

Prema definiciji prorok (kahin) proriče buduće događaje, predviđa budućnost i kraj svijeta, prognozira, nagovještava, itd. Većina njegovih proročanstava su prevare i nijedno od njih nije namijenjeno kao pouka ljudima.

Prema gore navedenim ajetima Kur'ana, Muhammed nije proricao buduće događaje, nije predviđao budućnost i kraj svijeta, prognozirao, nagovještavao, itd. Tako su priče o događajima apokalipse, a vezuju se za ime Muhammeda a.s., potpuno neutemeljene i vuku svoje nasljeđe iz biblijskih apokaliptičnih kazivanja.

Internet vrvi od facebook proroka, giliptera, prognozera, najavljiivača, prave se video klipovi, povezuje se armagedon sa koronom, samo što nije počeo lov na dedžala, glavni junaci su spremni, dolaze s neba i zemlje, najavljuje se masakr nad 14 miliona muslimana Istambula, mehdijeva koalicija pobjeđuje ... očekivani spasitelji samo što nisu tu... ali Muhammeda ni na vidiku ...

Muhammed a.s. nije bio prorok!

Apokaliptična literatura se često koristi simboličkim jezikom za izražavanje ideja o budućnosti. Apokaliptičke stvari ili najave iz posljednjeg vremena često su se otkrivale kroz snove, vizije ili ponekad anđele. Na primjer, biblijsko Otkrivenje govori o zmaju, zvijeri, četiri živa bića i drugim likovima na načine koji su doveli do mnogih tumačenja u vezi s vremenom i detaljima budućih događaja. Jedan od zajedničkih elemenata apokaliptične literature je naglasak na razaranju svijeta posljednjih dana praćenom stvaranjem novog neba i zemlje. Muslimanska apokalipsa se uglavnom vrti oko likova mehdija, dedžala i Isusa Krista.

Mogućnost dolaska Isaa, pojava dedžala i mehdija?

O ovim uzaludnim iščekivanjima evo jedan citat briljantnog uma Huseina ef. Doze:

“Postoje tvrdnje da Isa a.s. nije umro, da je živ uznesen na nebo i da će pred Sudnji dan sići s neba, ubiti Dedžala i uvesti Šerijat. U nekim akaidskim djelima ova tvrdnja je prihvaćena kao dogma. Tvrdnje o tome da je Isa peygamber još uvijek živ i da će sići na Zemlju neosnovane su i počivaju na veoma nesigurnim dokazima i dalekim aluzijama. Zato mnogi savremeni islamski autori odbijaju ove tvrdnje.

Tvrđi se, isto tako, za jednog od šiitskih imama, da je iščezao, da je negdje uznesen, živi i da će se pojaviti u vidu Mehdijs, otprilike u istoj misiji kao Isa.

Ovakva vjerovanja su, ne samo bez osnova, nego i veoma štetna. Kriju u sebi smisao pasivne predaje sudbini, pasivnog iščekivanja i iluzornog uzdanja u mrtve ljude, koji bi trebalo da ponovo ožive i dođu da spasavaju muslimane i oživljavaju islam. To je najobičnija zabluda i samoobmana. Imala je teških posljedica.

Još uvijek su tragovi jednog pogrešnog odnosa prema zbivanjima, prisutni u svijetu muslimana. Osjećaj vlastite odgovornosti za svoju sudbinu i vjeru da je ta sudbina u rukama svakog pojedinca, još uvijek nije prisutna dovoljno kod muslimana. Drugog okrivljavamo za našu sudbinu i od njega očekujemo milost i spas. Nedostaje nam vjera i pouzdanje u sebe i svoje snage.

Iz takve psihičke situacije nastao je čitav niz zabluda, koje su još više komplicirale i onako teško stanje. Tu je nastao deformisani smisao sabura u smislu pasivne trpnje, izopačen pojam tevvekula u smislu fatalističke predaje Bogu, okretanje samo Ahiretu, mrtvima, dawi, itd.

Nisu ovo nimalo jednostavne zablude. One su tim teže što su se pretvorile u vjerovanje i dobile status vjere.

U svakom slučaju, problem je dosta složen. Treba najprije dokazati da te zablude nemaju baš ništa sa islamom, da predstavljaju suštu suprotnost islamskom učenju i da ih se svaki musliman, ukoliko želi da bude musliman, mora osloboditi.”
(Husein Dozo)

Evo kako jedan drugi briljantni um predstavlja žudnju za pojavom mehdijs: “Mehdijs je ime za našu lijenost, ili još više, za lažnu nadu, koja raste iz osjećaja naše nemoći u situaciji kada je veličina teškoća i problema u potpunom nesrazmjeru s mogućnostima i sredstvima borbe. **Nema obećane zemlje, čudotvoraca, ni mehdijs. Postoji samo put rada, borbe i žrtve.**” (Alija Izetbegović)

★ Written by Mustafa Mlivo, the author of the first translation of the Qur'an into Bosnian★

<https://www.facebook.com/mustafa.mlivo>

<http://mlivo.com/>